

VI RADNA SJEDNICA UPRAVNOG ODBORA
Javne ustanove Bosansko narodno pozorište Zenica

Z A P I S N I K

MJESTO: zgrada Javne ustanove Bosansko narodno pozorište Zenica,
Trg Bosne i Hercegovine broj 3, Zenica,
II sprat, Kancelarija broj 45
DATUM: srijeda, 05. 04. 2023. godine
VRIJEME: 16.00 h

Sjednici prisustvuju:

1. dipl. pravnik **Una Kulenović**, predsjednica
2. dipl. profesor **Aldina Aganović**, članica
3. dipl. glumac **Adis Mehanović**, član

ZAPISNIČARKA:

4. **Selma Tabaković-Jašar**, voditeljica Pravne službe JU BNP Zenica.
Sjednici, po službenoj dužnosti, prisustvuje i direktor BNP Zenica, **Miroljub Mijatović**.

Dnevni red:

1. Usvajanje Zapisnika sa 5. radne sjednice;
2. Donošenje Pravilnika o javnim nabavkama roba, usluga i radova;
3. Donošenje Pravilnika o dugoročnom zakupu prostora;
4. Donošenje Pravilnika o načinu vrednovanja i uslovima nagrađivanja rada radnika;
5. Informacija o potrebi i mogućnostima nabavke protupožarnih vrata – *izvjestilac*: direktor JU BNP Zenica;
6. Razgovor sa predsjednicom UG Centar za edukaciju, promociju i afirmaciju djece i omladine „Umjetnost - Ars“ Zenica, na osnovu upućene Molbe broj: 288/23;
7. Razno.

1. Usvajanje Zapisnika sa 5. radne sjednice;

ZAKLJUČAK: Upravni odbor JU BNP Zenica jednoglasno usvaja Zapisnik sa pete radne sjednice, koji je prethodno dostavljen elektronskim putem.

2. Donošenje Pravilnika o javnim nabavkama roba, usluga i radova;

ZAKLJUČAK: Na osnovu dostavljenog prijedloga akta i razmatranja istog, Upravni odbor donosi novi **Pravilnik o javnim nabavkama roba, usluga i radova** JU Bosansko narodno pozorište Zenica, koji stupa na snagu osmog dana od dana objave na oglasnoj ploči.

3. Donošenje Pravilnika o dugoročnom zakupu prostora;

ZAKLJUČAK: Na osnovu dostavljenog prijedloga akta i razmatranja istog, Upravni odbor donosi **Pravilnik o dugoročnom zakupu prostora** JU Bosansko narodno pozorište Zenica, koji stupa na snagu osmog dana od dana objave na oglasnoj ploči.

4. Donošenje Pravilnika o načinu vrednovanja i uslovima nagrađivanja rada radnika;

ZAKLJUČAK: Na osnovu dostavljenog prijedloga akta i razmatranja istog, Upravni odbor donosi **Pravilnik o načinu vrednovanja i uslovima nagrađivanja rada radnika** JU Bosansko narodno pozorište Zenica, koji stupa na snagu osmog dana od dana objave na oglasnoj ploči.

5. **Informacija o potrebi i mogućnostima nabavke protupožarnih vrata – izvjestilac:** direktor JU BNP Zenica;

ZAKLJUČAK: Direktor JU BNP Zenica obavještava Upravni odbor JU BNP Zenica da je tokom ljetnog perioda planirana nabavka protivpožarnih vrata za potrebe Velike scene, koja bi trebala biti realizirana u dvije faze, uzimajući u obzir finansijske mogućnosti. Prilikom istraživanja tržišta, utvrđena je okvirna cijena nabavke u vrijednosti =6.550,00 KM bez uključenog PDV-a, a karakteristika ponuđenih protivpožarnih vrata jeste vatrootpornost u trajanju od 60 minuta. Predmetna nabavka nije navedena u Planu nabavki za 2023. godinu, te će po sticanju uslova za njenu provedbu, ista biti pokrenuta donošenjem posebne odluke kojom se ujedno mijenja plan nabavki.

Direktor JU BNP Zenica obavještava Upravni odbor JU BNP Zenica da je provedena i nabavka dva velika protupožarna aparata (50kg), takođe potrebna u prostorima Velike scene. U narednom periodu planiran je nastavak aktivnosti u obezbjeđivanju i unapređivanju protivpožarna zaštite, naročito po pitanju požarnog puta na dijelu službenog ulaza.

6. **Razgovor sa predsjednicom UG Centar za edukaciju, promociju i afirmaciju djece i omladine „Umjetnost - Ars“ Zenica, na osnovu upućene Molbe broj: 288/23;**

Uvod: U skladu sa članom 16. Poslovnika o radu Upravnog odbora i na osnovu upućene Molbe broj gornji (dostavljene na uvid elektronskim putem), radi razgovora u vezi sa statusnim pitanjem Udruženja „Umjetnost – Ars“, odnosno baletnog studija, na ovoj radnoj sjednici odobreno je prisustvo predsjednice Udruženja, gđe Samire Spahić, tokom ove tačke dnevnog reda.

Imenovana predsjednica Udruženja obraća se slijedom upućene Obavijesti Upravnog odbora JU BNP Zenica (broj 280/23), sa zaključkom da nisu ostvareni uslovi za nastavak dugoročne poslovno-programске saradnje sa Udruženjem, zbog nepoštivanja odredbi i neispunjavanja obaveza propisanih Sporazumom broj: 153/22 od 25. 02. 2022. godine, kao i neizmirenja dugovanja na ime zakupnina prema prethodnim ugovorima i troškova električne energije.

U uvodnom dijelu obraćanja, imenovana je izložila kratku ličnu biografiju te upoznala Upravni odbor JU BNP Zenica u novom sazivu o prvim počecima, odnosno o samoj ideji i pokretanju baletnog studija.

U saradnji sa gradskom upravnom, odnosno tada Općinom Zenica i na osnovu podrške tadašnjeg načelnika, JU Bosansko narodno pozorište Zenica je za rad baletnog studija ustupilo na korištenje magacinske prostorije na III spratu zgrade.

ZAKLJUČAK 1. Uvidom Upravnog odbora JU BNP Zenica u ugovor o zakupu iz 2012. godine, utvrđena je obaveza infrastrukturnog ulaganja Udruženja u prostorne kapacitete radi prilagodbe za rad baletnog studija, a što je realizirano temeljem budžetskih sredstava Općine Zenica dodijeljenih Zaključkom, broj: 02-23-302/12 kao i vlastitim sredstvima i ulaganjima Udruženja. Na ime infrastrukturnih ulaganja u objekat, Udruženje je oslobođeno plaćanja dijela zakupnine, te je ista iznosila =220,00 KM.

Predsjednica Udruženja obrazlaže da je funkciju vođenja baletnog studija i odgovornosti preuzela od prethodne predsjednice, potpisnice ugovora o zakupu, te nije bila upoznata sa predmetnim dugovanjima na ime zakupnine, koja zaključno sa 31. 12. 2022. godine iznose =12.200,00 KM, a na ime troškova potrošene električne energije =2.660,52 KM.

Upravni odbor JU BNP Zenica zaključuje da su bez obzira na prethodno navedeno, neizmirena dugovanja ostala i dalje obaveza Udruženja.

ZAKLJUČAK 2. Predsjednica Udruženja je prethodno obaviještena o potrebi predočavanja finansijskog izvještaja, izvještaja o radu i imovini Udruženja u skladu sa Zakonom o udruženjima i fondacijama Federacije BiH na ovoj radnoj sjednici, te na upit **predsjednice Upravnog odbora, Une K.**, imenovana obavještava Upravni odbor JU BNP Zenica o dijelu sadržaja istog:

- najveći dio troškova rada baletnog studija pripada angažmanu profesionalnog kadra za obuku djece, te ostali prateći troškovi smještaja i drugo,
- imovina Udruženja procjenjuje se u visini od ≈50.000,00 KM,
- oprema Udruženja uključuje odgovarajuću audio i video opremu koja se koristi za redovan rad, te ostalo (navedeno u izvještaju),
- ukupni prihodi u 2022. godini iznose =13.542,00 KM (prihodi od članarina: =5.076,00 KM, prihodi dodijeljeni po osnovu aplikacija i budžetska sredstva: =4.950,00 KM) a rashodi =16.300,00 KM.

Izvještaj o radu i preostali dio izvještaja o finansijskom poslovanju, predsjednica Udruženja dostavlja u pisanoj formi.

Predsjednica Udruženja takođe obavještava da je zbog kašnjenja isplate dodijeljenih sredstava na koje je Udruženje apliciralo u prethodnoj godini, kasnila i isplata troškova električne energije, te je po primitku istih izvršena i uplata dijela troškova. Preostali dio dugovanja će biti takođe izmiren u narednom periodu.

Mjesečni troškovi na ime električne energije iznose ≈300,00 KM.

Članica Upravnog odbora, Aldina A., dostavlja i upit o tome da predsjednica Udruženja svakako razmotri i u profitabilnost rada baletnog studija i mogućnostima daljnjeg rada, posebno uzimajući u obzir prikazane prihode i rashode.

Član Upravnog odbora, Adis M., takođe obavještava imenovanu predsjednicu Udruženja da je uskoro planirano izvođenje radova na sanaciji ravnog krova JU BNP Zenica, te da je prolaz kroz baletni studij tokom radova nezaobilazan, s obzirom da je to jedini pristup. U tom smislu, rad baletnog studija bi svakako morao biti prilagođen i oslobođen za izvođenje radova. Imenovana je saglasna sa navedenim.

Član Upravnog odbora, Adis M., takođe ističe i problem značajne buke tokom redovnog rada JU Bosansko narodno pozorište Zenica, odnosno tokom održavanja proba, premijernih i repriznih izvedbi koje su planirane rasporedom objavljenim na oglasnoj ploči JU BNP Zenica.

Predsjednica Udruženja potvrđuje da je upoznata sa odredbama sporazuma i da se rad baletnog studija treba prilagoditi rasporedu rada JU Bosansko narodno pozorište Zenica, o čemu su obavješteni i nastavnici baleta, te navodi da nije bila svjesna ovih tekućih problema i izražava spremnost na rješavanje istih.

Predsjednica Udruženja bit će blagovremeno obaviještena o početku radova na sanaciji ravnog krova, kako bi se u tom smislu i ukoliko to bude potrebno, prilagodio rad baletnog studija i obezbijedio adekvatan pristup za izvođenje radova.

ZAKLJUČAK 3. Na osnovu razgovora sa predsjednicom Udruženja i upoznavanja sa najvažnijim činjenicama iz izvještaja o radu i finansijskom poslovanju Udruženja, Upravni odbor JU BNP Zenica donosi odluku o kratkoročnom nastavku programsko-poslovne saradnje radi privremenog ustupanja na korištenje prostornih kapaciteta JU BNP Zenica, isključivo do okončanja školske godine, u periodu od 01. 03. do 30. 06. 2023. godine, uzimajući u obzir da bi trenutni prekid naštetio radu baletnog studiju. O nastavku saradnje i uslovima korištenja prostora JU BNP Zenica bit će potpisan poseban sporazum, koji potpisuju direktor JU BNP Zenica i predsjednica Udruženja.

Predsjednica Udruženja obavezuje se u narednom periodu izmiriti dugovanja na ime neisplaćene zakupnine u utvrđenom iznosu zaključno sa 31. 12. 2022. godine, kao i redovno izmirivati troškove potrošene električne energije. JU Bosansko narodno pozorište Zenica i Udruženje zadržavaju pravo naknadnog dogovora o načinu isplate predmetnog dugovanja.

U slučaju neizmirenja dugovanja u datom roku, eventualni ponovni zahtjev Udruženja za nastavkom korištenja prostornih kapaciteta JU BNP Zenica, neće biti uzet u razmatranje.

7. Razno

ZAKLJUČAK: Direktor JU BNP Zenica obavještava da je u cjelosti izmireno dugovanje JU Bosansko narodno pozorište Zenica prema EUROLIFTING d.o.o., podružnica Mervan Zenica.

Takođe ovim putem dostavlja se informacija da je planirano upućivanje dva radnika na poslovima scenske rasvjete na dodatno usavršavanje i obuku, koje se održava u prostorima SARTR-a Sarajevo u maju 2023. godine. Radnicima će biti obezbijedjeni troškovi učešća, ishrane i prijevoza.

Sjednica je zaključena u 18.10 h.

ZAPISNIČARKA

Selma Tabaković-Jašar



**PREDSEDNICA UPRAVNOG ODBORA
JU BNP ZENICA**

Una Kulenović

Zapisnik je sačinjen na tri (3) numerirane stranice.

Zenica, 6. 04. 2023. godine
Broj: 302/23